

**Umno: Pilih Pemimpin Yang Mampu Bantu Presiden, Timbalan - Mukhriz Bernama  
10 Ogos, 2013**

ALOR SETAR, 10 Ogos (Bernama) -- Setiap calon yang bertanding pada pemilihan Umno Oktober ini perlu mempunyai kriteria antara lain berjiwa besar dan mempunyai nilai integriti yang tinggi, kata Menteri Besar Kedah, Datuk Mukhriz Tun Dr Mahathir.

Beliau berkata ciri-ciri itu penting bagi memastikan pemimpin yang dipilih dapat membantu Presiden Umno Datuk Seri Najib Tun Razak dan timbalannya Tan Sri Muhyiddin Yassin terus memperkasakan parti.

"Seramai 150,000 ahli yang layak mengundi perlu memilih pemimpin yang betul-betul dapat terjemah hasrat dan cita-cita rakyat,"katanya kepada pemberita pada majlis rumah terbuka Aidilfitri Menteri Besar di Seri Mentaloon di sini hari Sabtu.

Beliau mengulas kenyataan Najib semalam yang berharap proses pemilihan parti yang akan berlangsung tidak merosakkan atau menggugat Umno sebagai sebuah parti terkuat di negara ini.

Perdana Menteri berkata sebagai sebuah parti yang telah mengubah perlembagaannya, Umno kini menjadi lebih terbuka, demokratik dan inklusif sehingga ramai yang menawarkan diri untuk bertanding berebut jawatan dalam parti.

Mukhriz berkata kekuatan parti perlu terus dijamin bagi membantu menjana transformasi seperti mana yang diidamkan pucuk pimpinan.

Beliau berkata walaupun Umno pada asasnya merupakan sebuah parti yang mengutamakan perjuangan Melayu, namun ia tidak pernah menidakkan pihak lain.

Sementara itu katanya, pihaknya berpuas hati dengan kehadiran kira-kira 50,000 rakyat ke rumah terbuka beliau hari ini dan ia merupakan petanda baik untuk masa depan negeri ini.

Turut berangkat pada rumah terbuka Yang di-Pertuan Agong, Tuanku Abdul Halim Mu'adzam Shah, Pengerusi Jemaah Pemangku Sultan Kedah, Tunku Annuar Sultan Badlishah serta Anggota Jemaah Pemangku Sultan, Tan Sri Tunku Abdul Hamid Thani Sultan Badlishah dan Tan Sri Tunku Puteri Intan Safinaz Sultan Abdul Halim.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=969205>